



108年教育部

閩客語文學獎

用本土語言尋找文學的能源



客家語 ▶ 現代詩 ▶ 社會組

陳美燕 女士

得獎作品 /

石跳仔（海陸腔）



### 【得獎感言】

煞猛做一件合意个事情，十年過後就變專家。

感謝教育部舉辦這隻文學獎，也承蒙評審先生用恁多精神評選偲兜个作品。偲自細戴莊下，長透會過坑壠河壩，鋪在水面頂个石跳仔，對偲來講試著當樸實、親切，行過去个時節非常有感覺。分偲想著一個人个成長，愛打幫當多人个幫助，比論詩中講著个阿公阿婆、爺哀、先生……，佢兜就像石跳仔，分偲俚踏等過，偲俚愛感謝、報答，也愛做別儕人个石跳仔。



108年教育部

閩客語文學獎

用本土語言尋找文學的能源

作品集

## 石跳仔

山坑面个石跳仔  
一隻連一隻  
像阿公阿婆彎彎个背囊  
痾在水竇  
老人家無講出嘴个痛惜  
在這向輒輒吩咐  
定定仔  
細義行  
堅耐个石牯  
分偈細步細步徙到  
平安个對向

水圳面个石跳仔  
一隻連一隻  
像爺娘打開燒暖个胸脯  
坐在水竇  
子女無注意个毋盼得  
在這向恬恬期待  
腳步正  
莫停跔  
定貼个基石  
分偈一步一步躡到  
順序个對向



108年教育部

閩客語文學獎

用本土語言尋找文學的能源

作 品 集

河壩面个石跳仔  
一隻連一隻  
像先生弓等砸礮个肩頭  
跔在水竇  
學生體會毋著个心力  
在這向再三叮嚀  
心肝在  
向前行  
穩當个磐石  
分偃大步大步行到  
理想个對向

無生溜苔个石跳仔  
分恁俚踪核核  
安全通過逐條  
人生無共樣个坑壩

無求回報个石跳仔  
也歡喜恁俚  
再過踏轉  
出發个對向